

四庫全書

集部

欽定四庫全書

集部
忠肅集卷八

詳校官編修_臣 程槐

中書_臣 劉源濟覆勘

總校官檢討_臣 何思鈞

校對官中書_臣 李巖

謄錄監生_臣 李元位

欽定四庫全書

忠肅集卷八

明 于謙 撰

雜行類

兵部爲保舉官員事吏科抄出把總脩守紫荆關指揮
僉事等官董琳等題先因達靼侵犯之時多從紫荆關
經過該兵部奏准差撥臣等管領官軍前來本關脩守
除依蒙到關看得本關墻城低薄山勢平漫外敵人馬
所行之蹟縱橫猶存彼時官軍驚惶寢食不寧莫知所

措衆皆曰難以脩守幸蒙守備本關大理寺卿孔文英
都督同知顧興祖運謀設法撫恤軍士盡心竭力不避
艱險晝夜區畫提督官軍將關口墻垣打取糙面大石
插和灰泥幫加高厚燒辦磚瓦圈造城門起蓋樓鋪添
築墩臺增脩關馬哨墻差人架炮哨瞭平漫去處盡行
斬削挑掘深溝險峻人馬俱不能通遂使遠近居民及
諸士卒皆賴以安本年八月內各官又因見本關城內
窄狹不能多積糧草駐劄大兵於城西原舊有大木廠

一處被敵燒毀不存地勢雖低丈量圍插立標杆分定
功程提督臣等亦用打取糙面大石脩創新城一所士
卒樂於趨事赴工一月之間而城已完亦用磚造城門
起蓋樓鋪墩臺等項俱皆齊備其城周圍廣濶儘可積
聚糧草駐劄重兵其餘隘口俱各增脩添砌堅固即今
達靼亦知關隘脩理堅固俱皆遠遁臣等竊見自去年
以來官軍中有殺獲敵一首級者俱蒙皇上悉加陞擢
今本關脩守官孔文英顧興祖前項晝夜用心之勞効

力設法之苦所脩邊關險固致使外敵聞風遠去論其功蹟亦宜陞擢勉勵將來緣係舉保官員事理具題該通政使司官奏奉聖旨該衙門知道欽此又該吏科叅看得本內脩築關口乃一事之勞達鞞遠遁實天威所致今大理寺卿孔文英都督顧興祖俱任文武重臣自合據忠盡節却乃通同所屬賁緣保陞宜從抄出奏請施行通抄到部查得先該守備紫荆關都督同知顧興祖大理寺卿孔文英奏稱本關把總指揮董琳性資篤

實管事公勤能撫軍士要乞量加陞擢等因具題本部
抄出爲照軍職論功陞授董琳別無軍功難准陞擢已
將奏詞立案今董琳等又奏顧興祖孔文英晝夜勤勞
所脩關隘險固外敵聞風遠去要將各官陞擢一節臣
等竊聞將帥以謀勇爲本而無謀無勇者輿論所不容
人臣以廉恥爲先而無廉無恥者人望所不副况造辱
國之罪復懷朋比之心雖致極刑猶有餘罪竊照都督
同知顧興祖猥以庸才先膺侯爵受浩蕩之聖恩掌神

機之兵柄不能矢心爲國惟務箕歛害軍剝衆人之膏
脂營一己之私計以致羣情怨怒而士氣沮銷兵備廢
弛而貪風益振及在京營謬當前鋒一敗不支六軍遂
覆上皇畱滯於邊庭外敵進逼於畿甸下而生民荼毒
上而陵廟震驚推原罪惡凌厲古今及照大理寺卿孔
文英本以一介書生任湖廣按察使不能頓綱振紀惟
務峻法嚴刑仁政全無清譽素乏爲事奏提來京遇赦
在部聽候皇上軫國家軍務之方殷念各官任事之頗

久特頒勅旨期與維新既任顧興祖以五府之官復授孔文英以棘寺之長使率領軍馬共守邊關期以洗心效勞屏蔽都邑今照紫荆關原有官軍已及一萬之上而各官在關守備將及一年之期本部爲因脩守本關久無成效節經議奏請勅督責縱使脩理堅完亦係分內事務豈期各官敢負更生之恩互爲朋比之舉顧興祖等明知董琳係是部下別無軍功而奏要陞擢董琳等明知顧興祖孔文英係是大臣不當援引而上言稱

薦且云外敵之道實彼脩闢之功蔑視朝廷欺罔君上
原心實出於奸謀論罪當加於極典致被吏科叅出資
緣保陞情犯合將各官令法司差人通取赴京究問明
白奏請發落仍乞聖裁另行差官前去更替庶公道昭
明人臣知懼緣顧興祖董琳等俱係軍職孔文英係京
官及奉欽依該衙門知道事理具題景泰元年十月二
十八日奉聖旨各官互相保舉乃人情而已非爲重事
都不問恁部裏行文書去與他們知道著用心整飭邊

務有功時陞賞朝廷不吝欽此

兵部爲病故官員事景泰元年十一月十二日禮科抄
出雲南都司等衙門署都指揮使事都指揮僉事胡誌
等題有總兵官黔國公沐斌先於正統十四年九月初
二日忽患風濕手足緩弱節次請醫調治稍痊一向扶
病管事景泰元年九月十九日又加嘔吐咳嗽病症至
二十八日轉加痰疾喘急醫治不痊至本年十一月初
五日身故緣係總兵鎮守官員具題該禮部官欽奉聖

旨該衙門知道欽此欽遵抄出到部除另行外照得雲南
地方多係土官衙門自國初以來皆係黔國公父子相
繼世守其地號令素行蠻夷信服今沐斌既已病故一
旦改委他人代總兵政竊恐衆心不服難於統理况隴
川等處賊子遺孽未曾殄除而附近貴州俱有盜賊生
發必須主將得人然後地方安妥訪得沐斌應襲之子
尚幼其姪沐璘見任雲南都司署都指揮僉事威望雖
未素著實乃沐氏宗枝夷人頗知其名遠近亦皆屬望

若是權宜陞用事體實爲允當及照右都督方英見任雲南克叅將征進隴川驍勇善戰廉介不貪雲南之人素所畏服亦堪委任但本官見在貴州殺賊先因巡撫貴州右寺丞王恂保奏方英堪克總兵鎮守貴州本部爲照貴州等處已有總兵官保定伯梁瑤方英見克右副總兵賊寇未曾平安難便准令鎮守已經議擬奏准令方英仍克副總兵與梁瑤等督軍勦賊候事平日就令方英克總兵官鎮守貴州去後今照貴州等處賊寇

尚未盡絕正用能幹將官撫捕方英難便那動合候貴
州賊平另行定奪伏望聖恩先將沐璘量陞都督同知
或都督僉事請勅充總兵官掛征南將軍印令其鎮守
雲南撫安夷民操練軍馬禁革奸細保障地方凡百所
行務在上體聖心遠法祖宗毋貪淫暴虐以失人心毋
怠忽因循以誤邊務如遇邊境地方蠻寇生發會同叅
佐并守土官員計議停當相機撫捕不許輕易畏縮因
而失機誤事及訪得雲南都司署都指揮使事僉事胡

誌練達戎政比衆爲優合無實授都指揮使請勅本官
克左叅將協同沐璘鎮守仍令沐璘胡誌公同鎮守雲
南內官郝寧叅贊軍務副使鄭顥及都布按三司堂上
官巡按監察御史於彼處都指揮或指揮內推舉堪克
右叅將二人開具實蹟作急會奏以憑定奪不許徇私
濫舉緣奉欽依該衙門知道事理具題奉聖旨是沐璘
陞都督同知掛征南將軍印克總兵官鎮守雲南胡誌
陞署都督僉事克左叅將協同沐璘鎮守撫安軍民務

要事妥夷安欽此

兵部爲邊務事兵科抄出鎮守山西都察院左副都御史羅通題准本院咨准兵部咨兵科抄出欽差刑部右侍郎江淵題節該欽奉勅命爾往山西鴈門關等處巡視凡彼處整理關隘一應事務悉聽爾便宜處置欽此除欽遵外今將便宜合行事件開坐具題奉聖旨該衙門看欽此欽遵抄出到部逐一議擬開坐具題本部官欽奉聖旨是欽此欽遵將開奏事件抄咨該院煩行鎮

守山西右副都御史羅通并鎮守鴈門關右副都御史
朱鑑等俱照依本部奏奉欽依內事理欽遵備由移咨
到職臣除會同鎮守山西署都督僉事王良鎮守鴈門
關右副都御史朱鑑守備偏頭關都督同知杜忠等巡
按御史涂謙并都布按三司官計議外今將議過事件
開坐具題本部官欽奉聖旨該衙門看欽此欽遵抄出
到部案查先該右侍郎江淵題前事已行議奏行移勘
議去後今奏前因合行開坐謹題請旨

計開

一守備代州偏頭關等處各衛所州縣官軍民快人等
先因聲息緊急該鎮守鴈門關都指揮同知翁信奏准
作長班操守不許更替今天時漸寒軍士衣鞋不給受
苦不堪陸續在逃十去六七及官府催促官軍則潛避
不出民壯則合家在逃欲照例究治恐有激變欲姑息
不問則徃徃倣倣愈肆奸頑以致邊關空虛失守誤事
即今聲息寧息合無將前項軍壯分作兩班每班半年

一替其替回者仍於原衛州縣操備就令置辦衣鞋軍器聽候班次行取則人皆知有更替定期不致逃竄而衣鞋軍器且得鮮明堅利該兵部議得先該右副都御史朱鑑奏要將原召續召民壯分作兩班半年一換等因行該署都督僉事王良等會同都布按三司巡按御史回奏勘得前項民壯一萬九千四百八十二名內在逃未到數多見在者分撥已定今朱鑑奏要半年一換雖便民情緣人數不彀事有窒礙合照舊操備仍乞優

免雜差等因已經議擬奏准馬隊每戶免其二丁步隊免其一丁差役去後今奏前因合無再行鎮守山西右副都御史羅通署都督僉事王良并巡按御史三司等官公同勘議應否輪班操備惟復止是照舊其於人情事體何者利便何者窒礙臣等議得先前聲息緊急民壯數少不可分班今邊境已寧合依侍郎江淵所言分作兩班更替則人不在逃得其實用而衣鞋盔甲器械亦得鮮明鋒利前件查得近該鎮守鴈門關都指揮同

知翁信奏稱義勇未曾到官數多其到者又各在逃要
行催勾齊存留山西有糧去處操備等因本部為照山
西聲息頗靖邊儲不敷田禾少收人民艱難已經奏准
行移左副都御史羅通等通將前項義勇着落所司拘
齊就存各府州縣兼同本處官軍操守去後今羅通等
又奏議要分作兩班操備難便定奪合無再行羅通王
良朱鑑翁信從長計議如果應分兩班就便照依擬奏
事理分班依期赴操若是各就本處操備便益宜從本

處操守聽調務在處置得宜人無失所

一偏頭關見有操備官軍九千餘員名欲要屏障河曲
保德等州縣及太原左等衛屯堡今敵往來不經本關
却從應朔等州直入靜樂寧化保德境內殺掠軍民窺
伺太原平陽其偏頭關僻在境外雖擁重兵無從策應
看得鎮西衛當三岔衝要之處有路直抵平陽等府
若不早備深為未便合無將偏頭關原有官軍止留二
千在彼哨守其餘盡撥鎮西等衛分守則糧運近便控

制有方而平陽等處可保無虞該兵部議得偏頭關官軍係比先撥定若一概那動恐黃河結凍時達靼過河侵擾合無行移山西左副都御史羅通署都督僉事王良公同都督同知杜忠左叅議葉清從長計議本處地方應否止用官軍二千守備相度本關與鎮西衛地形險易邊情緩急或可照侍郎江淵所奏施行或將鎮西一衛調去偏頭關官軍發回或依舊不動務在彼此無誤明白折衷臣會同王良杜忠葉清計議得鎮西衛至

偏頭關二百八十里內有岢嵐州保德州河曲縣三處人民及太原左右前三衛鎮西衛共四衛屯田之所俱在偏頭關內鎮西衛外其鎮西衛三岔路口有八柳樹堡子舊城一座見有太原右衛屯軍在內居住路當衝要一路通朔州一路通偏頭關一路通鎮西衛乃扼喉之處合將此堡作哨馬營撥偏頭關官軍二千駐守仍屬都督杜忠提調遇警則屯軍可守城馬軍可出戰朔州偏頭關鎮西衛三處出軍策應皆可一日而到如此

則彼無入侵之路而保德奇嵐河曲與太原等四衛屯
所可保無虞而平陽之路敵不敢窺矣其偏頭關仍舊
不動前件既已各官會勘得八柳樹堡路當衝要合准
所擬行移王良羅通杜忠等將本堡修設堅完照數撥
官軍二千委敢勇頭目管領前去屯駐聽杜忠提調遇
警則相機守戰無事則趁時耕牧務在有備無患

兵部為邊務事兵科抄出提督獨石馬營等處操守後軍都
督府都督僉事董斌題近該兵部議擬奏准令臣提督獨石

馬營雲州鵬鶚赤城龍門李家庄長安嶺等處邊城修理墩臺防護糧儲等項竊照前項城池委係外控敵境內庇宣府懷來永寧一帶若該處城守嚴固則腹裏自然無虞比先各城俱係修理堅完樓櫓壯固倉儲廣積器用全備又有精壯官軍帶家小分投守備遇警易為措置近因達靼犯邊將各城捐棄以此敵無忌憚往往在長安嶺一帶出沒搶掠而獨石馬營等處城池樓櫓房屋倉庫多被敵燒毀殘壞其各該城堡官軍雖已起那腹裏又多凋耗十無四三過者天威遠

加向化皇上制治保邦留意邊備將前項城池重復整飭修設此誠安邊長策但臣智慮淺疎竊以為今日之事邊備為先況前項城堡殘壞士馬消耗若不惟新令圖何以慎固封守今將合行邊備事件開坐伏乞聖斷早為施行邊方幸甚具題該本部官欽奉聖旨兵部看了來說欽此欽遵抄出到部今將本官所奏事件逐一詳看議擬開坐具題景泰元年十一月二十六日奉聖旨是欽此

計開

一照得守備懷來永寧等處都指揮楊信等俱有奉到
勅書行事今臣提督地方比永寧尤為切要若不綸音
渙頒下人無所畏懼倘有警急調遣不肯聽不無悞事
乞賜臣勅便益前件照得都督僉事董斌既已欽命提
督獨石馬營雲州鵬鶚赤城龍門李家庄長嶺等處修
理城池防護糧儲等項係干重務合無准奏請勅本官
令將一應邊備用心整飭務求實效毋事虛文果有安
邊長策宜從區畫事體重者具奏施行不許假公營私

苦害邊軍及因循日月致誤重務

一獨石馬營赤城鵬鶚李家庄龍門等衛所官軍
除昌平侯楊洪帶領赴京三千員名近蒙兵部奏
准發回原衛所令臣率領提督其餘未曾赴京之
數中間雖有強弱不一然有在懷來永寧暫且安
插者有在宣府等城差使操備者今要將前項城
堡修復若不將各城原有官軍人等盡數令臣管
束委係孤懸城池憑何守戰况各官軍畏懼原處

守備往往希求腹裏衛所居住苟且度日乞勅兵部計議合無將口外衛所官軍但係獨石龍門李家庄等處城堡官軍原先暫且安插腹裏衛所并舊日跟官隨操等項不分老少男婦務要一名名令臣鈐束點聞或就令回還原衛所或候明年春暖回還原處守禦隨佳以實虛懸之城不許各該守備等項官員占愴便益前件合准所奏行移該府轉行宣府總兵等官撫寧伯朱謙等將獨石龍

門李家庄雲州鵬鶚赤城等處但係安插宣府永寧懷來及各該衛所城堡住坐并舊日限官隨操等項不必分老幼男婦著落經該官旗逐一覈齊俱令董斌鈐束其間有願去原衛所趁薪米糧養贍者聽從其便若自不願前去候明年春暖盡數督發回還不許各該守備官員占恤及托故縱放來京躲住有誤邊備仍令董斌加意撫恤以濟邊務不許生事虐害致令失所

一照得獨石馬營等城遠在宣府之北臣若率領
軍馬到彼往來提督修守遇有緊急事情必須差
入奏報緣無起馬符驗若候行移萬全都司差人
不無展轉遲悞乞給臣符驗庶得便於奏報前件
合准所奏關給達字號雙馬符驗一道就令原差
奏事百戶鹿鏞齎與董斌收用

一照得獨石馬營等處城池委係孤懸境外臣今
提督修守敢不罄竭衷誠但以謀貴先定兵貴有

制若不提綱挈領非惟人無統屬抑且推調悞事
乞勅兵部計議合無將萬全都司多餘都指揮數
內摘差老成能幹者數員分投獨石馬營李家莊
鵬鶚龍門等城著令專一守備操練官軍不許輕
動臣往來提督巡視遇有緊急事情並聽臣調遣
庶不臨期悞事前件合准所言行移宣府總兵官
撫寧伯朱謙公同鎮守叅將叅贊巡撫等官內官
栢玉右都督紀廣侍郎劉璉僉都御史任寧及都

督僉事董斌等從長計議獨石馬營赤城李家庄鵬
鶚龍門雲州長安嶺等處合用都指揮幾員就於萬
全都司都指揮內推選有謀有勇之人分守前項城
堡嚴督所在官軍人等專一隄備遇有警急俱聽董
斌節制調遣不許退縮不即前去及擅離信地營求
別差其總兵等官亦不許徇私偏向將精壯官員占
留却將怯懦之人充數致誤邊務事發一體治罪仍
令朱謙等將選委過都指揮職名作急開奏

兵部爲陳言備邊事兵科抄出本科給事中黃仕儁題
竊見中國土地雖是無窮而其財賦所出亦自有限原
其所由天惟生此以供朝廷及百官俸祿之需初非期
有邊外勞費之耗是邊外本供費所不載而百姓實國
家所宜恤以培植邦本爲供應之具而已今者邊庭乞
和譎詐莫測必以還我上皇則兵備不約而解珍物不
求而得府庫不刼而虛民力不用而弊國稅不攻而靡
觀上皇歸時彼使未起而運糧之卒即各遣歸各邊見

其散軍而戒嚴之意不無十緩三四非墮緩兵之計歟
見其和成兵緩大起無厭之求今日求某物與之明日
求某物亦與之今年遣使增數百明年遣使增數千及
其久也多而無數使輶往來絡繹不絕又其久也求之
既屢待之必厭欲不應之恐自壞和好其短在我以召
禍釁欲曲意應之誠以府庫之財有限民之膏脂枯竭
又恐乘我不虞以啟一旦襲虛之患至於不可磨滅訪
得去歲額森大同敵殺之際其巴延特穆爾親與總兵

官石亨打話言累年我使來貢求金銀銅錢等器織金
蟒龍等衣寶石珍珠等物俱不見與是以興兵遠來蓋
求物不得遂致入侵則將少有厭忽之心必致入侵可
知臣詢侍郎趙榮等言托克托布哈固不見有南侵之意
至於額森奸雄黠狡則有莫測之機觀其即今遣使至
於數千拆牆強入略無忌憚皆恃去歲土木之利逼城
之敵氣驕志滿縱橫自如蓋以興兵南來狃於多勝未
遭我軍敵殺之苦痛挫狼戾之氣順之則和拂之則敵

况西北諸番今已蟻附而今所求器物又皆帝王之具
陰謀不軌意已明甚豈可信其必和以爲久安長治之
計哉伏望聖上念祖宗創業艱難今日守成不易勞心
焦思兢業圖理毋以土木而寒其心毋以逼城而危其
意推原所由皆因權奸所誤非區區侵侮之力乃能至
此然好生惡殺貴人賤畜天之心也人之願也今彼掠
我軍民不啻草芥糞土無分貴賤牧馬廠羊餓死不知
其數因而遭虐疾病者亦不知其數是乖天之心也拂

人之性也故曰天作孽猶可違自作孽不可逭今彼殘虐天民自作其孽莫此爲甚是自干天誅天又將假手於我陛下以殄滅之昔我太祖高皇帝奉天之罰師至應昌太宗文皇帝肅將天威親抵沙漠皆不聞彼以獷悍而能禦我今皇天上帝以中興之運付之陛下正猶天命太祖太宗之時也况天之所助者順人之所助者信陛下惟能脩德勤政順天信人則天自順乎我人自信乎我彼雖獷悍豈不足以削平以享無疆太平之治

且和可暫而不可久利於彼而不利於我也昔有商之
世鬼方跋扈而高宗討之有周之時玁狁作慝而宣王
逐之使鬼方玁狁可和而利於我則高宗宣王必先與
之和而不煩士馬之勞矣因其譎詐無定和不可恃故
直舉兵討之以寧華夏延祚數百年二君至今稱爲中
興令主但即目以時觀之彼勢猶張我師尚弱姑勒兵
以聽之嚴備以俟之佯存和好以養銳蓄威待時雪恥
然九重深邃下情難達邊事內攻幽遠莫知萬機之暇

乞御文華殿或進內閣儒臣或召元老碩輔少降天顏
從容諮訪或令口陳或具題帖陛下從而采擇可否次
第施行如京師天下根本軍馬幾何士卒操法精緻者
何營則必賞其頭目庶怠惰者自知警懼將臣素著謀
勇者幾人陛下從而親書其姓名倉卒調用庶不失人
某有將才淹在卒伍之下者拔之某事掎剋隳我士卒
之心者罪之京軍貴多欲備調用今而數少設何法以
增之軍士日練本期克敵今而多怯行何計以銳之外

敵分外之求難事之請從何長以處之西北諸番聞風降附施何間以孤之威敵必先以其所畏宣府大同迤西一帶京師緊關屏蔽急要驍勇謀將今朱謙謀勇不及楊洪而紀廣慈柔郭登雖曰謀勇且久患風疾而裨將無聞今外敵所畏惟楊洪石亨父子然二人已總重兵在京固難輕動而楊俊石彪俱驍勇有謀合令協副朱謙郭登雖曰謀勇赴時設備庶免臨時掣肘他如各邊某無謀略徒擁將名久妨邊務即別選能者以代之

書云去邪勿疑是矣某懷智略久被忌抑一籌莫展即特命以伸之書曰任賢勿貳是矣某處將臣不智必致相激非國之福也陛下即以所記將臣領其事俾不智者知所畏憚矣某處兵寡而將勇爲可托某處兵衆而將怯之可憂某處衛堡不堪策應某處堪宜益兵添將相兼守把某處將帥頭目剝削士卒相繼逃竄邊關空虛匿不以聞某處堪宜經理屯田未及議奏處置某處宜廣蓄軍餉節被管糧官員措置顛倒糧儲有名無實

某處武職鎮邊年久精忠可褒獎以勵廉污某處文職貪酷宜行體實劾去以安士卒又如各邊年久文武官員猶鼠一家軍士疲憊今後合每年宜遣諳曉邊務大臣數人分行稽其弊端以憑賞罰如此一一諮訪而處置之則邊事無一而不舉矣至於都司方面風憲守令等官向也廉今也貪而殃民某官雖曰能事其實暴不堪命某官雖曰忠厚其實罷軟無益民事某官老邁不能舉事而乃貪得不去某官掊歛以阿上官見畱某官

忠鯁以直事人見黜某官聽政超異堪宜褒勸某官才堪大用久滯下僚凡軍民有無利病四方有無休戚及今後亦合每年分遣廉明大臣詢察以憑黜陟如此一采擇而舉行之則內政亦無一不修矣邊事內政既皆修舉則將士勇奮堅如泰山民之供餉如子趨父昔宋用孟宗政金人不敢窺襄漢中國相司馬遼人不敢犯北邊今我之精擇賢能養銳蓄威如此至若外敵敢肆無厭之求仍遣無數之使必發勅額森喻以禍福令

各守分雖古者遣使彼此不過正副從者不過數人今
後遣使不過百人以通和好倘過其數則其短在彼因
而責之庶或守分不敢違約使若侵逼邊境則必縱我
銳兵奮其勇武大舉勦殺痛挫鋒銳彼勢力自散計算
自迷將奔遁無門退保無暇正如太祖太宗應昌沙漠
之舉也安敢窺我中原擾我疆場以損我士馬哉由是
戒飭邊關無通彼使中國自中國外域自外域不惟莫
測我之虛實以息釁端且亦得免邊外之耗以固我邦

本則將來太平景祚延至無窮又自陛下開之而其中興功業之隆直與高宗宣王同一垂休無疆矣倘不此之圖陛下惟廣天地之量應無厭之欲臣恐彼以多事之請固不能一一遂欲不遂其欲必致交兵惟恐邊力不支又或有如前日毀關逼城之患而我京軍止足以自護而不能策應邊關逼城止足以自守而不敢掣援京師甚至被阨所援而進退無路又或舉我南北要區坐困我師雖有勤王義兵莫由內應又恐他盜亦聞風

而起其郡縣軍衛亦被牽制不敢北望事至如此思欲走檄多方招募民兵則又有兵無將京師急欲調用則又有將無兵況民兵素不識戎募之雖多亦奚以爲昔宋賊劉豫大募民兵七十萬南侵至廬州等處一鼓敗之北走原其所以皆由閒暇之時失於豫圖方略早建事機故也書曰惟事事有備無患傳曰凡事豫則立不豫則廢又曰雖有智慧不如乘勢惟願陛下乘此暇時汲汲畱意焉宗社幸甚天下幸甚具題本官於奉天門

奉聖旨朕覽其所說都是憂國保民之心戶部兵部會
官詳看可行可止即便議擬停當來聞欽此欽遵會官
看得奏稱外敵額森等扭於多勝未遭我軍敵殺今已
蟻附所求器物皆帝王之具陰謀不軌意已甚明要發
勅額森喻以禍福令各守分今後遣使不許過百若違
約侵擾邊境則必縱我銳兵大舉勦殺一節臣等竊詳
額森自其父脫歡以來世受朝廷厚恩一旦諸部改慮
侵擾邊境進逼京畿震驚陵廟其爲仇恨何可勝言額

森自知罪惡稔盈人怨神怒及知我中國有備遣人納款和好如故皇上軫念蒼生俯徇其情節次差來之人朝廷倍加賞勞邇者額森又遣恩克等二千六百餘人到京進馬皇上天日之明豈不知彼情譎詐所遣數多一則費我財用一則探我虛實但以彼既進貢而來亦難拒而不納以此待遇之禮不廢而防範之法亦未嘗不慎今恩克等已還合無候額森再遣使到京請勅命其齋回曉諭額森自爾等草心悔過敬順天道節遣使

臣朝廷俱待以殊禮茲者恩克等若干人到京委實太多又況口外宣府懷來等處先因爾等侵擾所在人力艱難自今已後爾等當體念我祖宗待爾之厚誠爲和好保全始終所遣使人多不可過百十人朝廷數大信於天下必不渝盟致有怠慢候額森仍前差遣人衆臣等另行議奏處置其奏要萬機之暇乞御文華殿進內閣儒臣或元老碩輔從容諮訪或令口陳或具題帖陛下采擇可否次第施行一節查得近該南京工科給事

中張雲翰奏前事該禮部議擬覆奏節該奉聖旨今後各衙門如有軍國重務得失的事面奏施行欽此欽遵已有前項奏奉欽依事理別有定奪其奏要令楊俊石彪協副朱謙郭登一節照得宣府見有總兵官撫寧伯朱謙叅將左都督紀廣又有都督僉事董斌提督獨石龍門等處江福守備萬全右衛等處都指揮楊信守備懷來等處大同見有總兵官定襄伯郭登叅將都指揮潘興及都督方善分守東路許貴分守西路及照今年自

春初以來外敵不時攻圍各該邊城所在鎮守等官俱能竭力防守或出兵對敵况楊俊先充宣府叅將伊父昌平侯楊洪奏伊年幼無知富貴已極性資粗率語言輕躁非惟長惡不悛必誤邊方大事乞取赴京隨操等因已蒙欽准將楊俊取回石彪充游擊將軍帶領官兵往山西巡哨回京未久若將各官再行分差宣府大同非惟官多人少下情不堪尤恐節制不一人難遵守已後若緊急用人另行定奪其奏各邊某無謀略徒擁將

名某懷智略久被忌抑某處兵寡將勇可托某處兵衆將怯可憂等項緣無指實合無行移宣府大同遼東陝西等處巡撫鎮守都御史侍郎及巡按監察御史令將彼處守臣勇怯兵備虛實城堡道路險夷糧餉器械多寡等項一應邊務逐一用心體察諮訪何人可存何人可去何者可以脩復何者可以用工無廢何處險要合當增兵守備何處偏僻不當多用軍馬何法可以實邊何方可以禦敵務要體覆詳審處置允當上副朝廷下

合輿論明白奏請以憑裁決其奏都司方面風憲守令等官某官貪而殃民某官罷軟老邁某官忠鯁以直見黜某官德政超異等項合每年遣廉明大臣詢察一節查得各都司方面守令等官節有欽奉詔勅行令各處巡撫風憲等官從實體察賢否奏請黜陟合再申明通行各處巡撫官巡按御史查照先前節奉詔書事例務要巡行所管地方將軍衛有司官員從公體察賢否具實奏聞以憑定奪不許因循怠忽徇情作弊以致妨政

害人不便具題景泰元年十二月初六日奉聖旨是欽此

兵部爲擒獲達靼事內府抄出鎮守大同右少監馬慶題該左叅將右都督方善手本據高山衛哨備指揮李英呈該守土山兒墩百戶蕭勝報本年十二月十九日午時分軍人趙蘆斗瞭見境外有步行人腰帶弓箭前來隨令夜不收呂小良等二名下墩潛入攔馬牆內因見向墩射箭認是達靼其呂小良等奮勇向前擒獲連

人解到審係恩克特穆爾額森部下有額森差賽音特
穆爾等將領人馬二百餘騎在邊哨探接取進貢使臣
因我省得漢語差來打聽聲息就被捉住等因行移知
會會同總兵官定襄伯郭登巡按直隸監察御史鄭韶
等計議得達靼出沒不肯轉離鞍馬今恩克特穆爾步
行到墩又止一人既稱打聽進貢使臣其守墩官軍只
合溫言撫接却乃掩襲搶拏非惟有失朝廷大信抑且
引惹事端又恐來降及走回人口小人邀功駕禍無辜

如蒙准題乞勅該部通行禁約沿邊官軍惟當謹守信地嚴加瞭望不許貪圖小利妄生邊釁等因具題該本部官欽奉聖旨兵部知道欽此又該總兵官定襄伯郭登等亦題前事通抄到部臣等竊惟中國之待外番固當振之以兵威尤當撫之以恩信所以折其強而結其心也今額森節次遣人朝貢其譎詐之謀雖未可知而和好之禮則未嘗有失今以使臣未回遣人探聽迎接其恩克持穆爾既不騎坐又不潛入邊城明說探接使臣

別無奸細情節而守墩官軍就將本人搶拏只貪一時之近功不顧朝廷之大體而都督方善又不斟酌事情輒便輕信起解今訪得恩克特穆爾見行監問竊以爲此特一俘因爾殺之不足爲武而或有以爲釁舍之以爲怯而或有益於事如蒙聖恩乞勅法司再行研審委的止是探聽使臣消息別無其餘重情請勅令該府差人連恩克特穆爾齎送前去大同總兵官定襄伯郭登等處收領撫令聽候邊上如有額森差來之人就彼

交與領回仍諭額森以朝廷忠厚撫待之意使知感激本部仍行都督方善并各邊總兵鎮守等官今後各要整搦軍馬固守地方果有外敵侵犯相機勦殺若彼中遣人來邊打話止是一二人三五人別無奸細情由及遠探隨後再無跟隨掩襲人馬就便撫令回還不許貪圖小利邀功生事以啟邊釁以貽後患亦不許指此爲由縱彼入境剽掠以誤邊務緣係請勅及奉欽依兵部知道事理具題景泰二年正月初三日奉聖旨是欽此

兵部爲怠廢軍政事該刑科等衙門劾奏都督同知衛
穎等交通飲酒奸宿樂婦怠廢軍政等情欽蒙聖恩寬
宥弗加罪責此誠天地生物之仁然臣等竊惟衛穎等
俱以凡才叨膺重任擢居都府分掌兵戎不能宣力而
竭忠乃敢縱欲而敗度況終日飲酒爲樂又復用錢買
奸若非剝削害軍此物從何而得即目北敵雖已請和
而邊報未甚寧息舊恥未雪當人臣卧薪嘗膽之時大
舉未圖宜將帥捐軀致命之日而衛穎等所爲若此上

辜朝廷之恩下失軍士之望惟騁一己之嗜欲豈恤衆情之艱難曩者土木之潰大事幾危正由爲將帥者平日貪淫敗度受財賣軍互相交通夤緣黨比戰鬪之事不習兵戎之政不脩將帥互爲仇讐上下自相矛盾以致臨敵無功望風瓦解前日之覆轍未久而衛頴等又復效尤廉恥蕩然全無忌憚比者在營軍士逃者數多動以萬計安知不爲衛頴等賣放逼迫所致杜漸防微不可不慎且賞從賤罰從貴此古今之通典而兵家之

要術也今衛顙等位重任隆而貪婪無度則下人何所
取法而管軍者何以爲戒所據各人罪名已蒙聖恩寬
宥而此等駟儈之才終難任牙爪之寄合無將衛顙范
廣陶瑾張義郭英穆晟俱不許管理府衛事務及坐營
領軍調往開平獨石大同一帶操守破敵以贖前罪庶
使法令昭明而餘人知懼恩義竝行而戎政脩舉臣等
猥以駑鈍叨掌兵戎顧惟將帥之用舍繫乎國家之安
危事有當言不敢緘默具題景泰二年二月二十日奉

聖旨衛顥等朝廷擢用掌管兵戎不能竭忠表率下人却貪亂酒色罪本難恕既已饒他罪今後著改過自新但再犯必不赦欽此

兵部爲操備省減糧儲等事兵科抄出五軍中軍大寧都司茂山衛管操指揮同知夏正奏竊照保定真定涿州易州等處因與紫荆倒馬關相近正係緊關去處節蒙聖慮每處差撥官軍不等有五千員有七千五百員名前去守備中間多係在京并通州神武中等衛官軍

其保定衛官軍尚有四百八十九員名俱各在京操備
緝知各處亦然臣竊照京衛官軍在京月支糧一石在
外各處又支行糧四斗五升在外旗軍在衛月支四斗
在京又支糧五斗有此重費糧米如蒙准題乞勅該部
計議合無將真定保定等衛官軍查數替回在京等衛
官軍每一千名月省在外行糧四百五十石保真等衛
旗軍回還各處操備每一千名月省在京行糧五百石
其一千名内外省糧九百五十石如此不惟糧儲減省

抑且衣鞋盤纏免致缺乏遇有逃故等項便於勾補其各關口山徑險阨鄉道平昔諳曉進退無礙戰守兩便調用不失實爲經久之計具題該通政使司官奏奉聖旨該部看欽此欽遵抄出到部叅看得保定等衛所官軍比先年間除輪班赴京操練及守城屯田等項其餘各照地方量撥紫荊倒馬等關脩守近因外敵侵逼所在官軍統領前去數少本部節該議奏欽命文武大臣在京各營量數選撥官軍統領前去各城各關兼同彼

處原有官軍人等操備脩理今奏要將前項撥去官軍
取回却將保定真定并通州神武中等衛在京操練官
軍發回於糧儲雖曰頗減於事體則有窒礙蓋在京撥
去各關各城官軍其數不下十萬而各衛赴京操備官
軍每衛不過三五百或千餘人今又分作三班輪流放
回一班取討衣鞋若將保定真定等衛原撥在京并各
關各城操備官軍取回原衛不無守備缺人遇驚無憑
調遣况在京見畱官軍俱係選作頭班預備破敵人數

決難放回及照自去年春初以來境外節報外敵聲息
各城守備官員往往奏要在京撥軍前去後因侍郎江
淵具奏已將保定真定右衛中所調去紫荊真定衛中
所調去倒馬關涿州中衛後所調去白羊口其前項調
去所分官軍不問在京五軍三千等營盡數起發況在
京官軍撥去邊關脩守乃權時之宜在外官軍輪班赴
京操練實經常之道今若將前項衛分官軍發回原處
則山東河南地方亦係鞏固京師重地各都司衛所赴

京官軍俱要照依此例回還本處京師止用在京各官
軍操備是豈居重馭輕治內攘外之道揆此事體委的
難行大抵夏正所奏不過假借省費糧儲之言以遂取
回軍士之計所奏難准合無將保定真定等衛赴京官
軍照舊輪班操練其各城各關京師撥去官軍候邊務
寧息另行議奏定奪緣奉欽依該部看事理具題景泰
二年二月二十二日奉聖旨是欽此

兵部爲邊務事職方清吏司案呈准後軍都督府經歷

司手本奉府案令准鎮朔將軍撫寧伯朱謙咨據金吾右衛帶俸正千戶王信呈宣德十年自願前來宣府報効操練今奉後軍都督府勘合各處報効操備官軍舍人餘丁即今邊境稍寧虛費糧賞暫且回衛入伍呈乞放回移咨連人送府轉送到司案呈到部臣等竊詳邊方者京師之藩籬軍馬者朝廷之重事必使事體各歸職掌庶幾緩急不致誤事今照宣府大同遼東并陝西各邊俱係緊要去處正用官軍守備朝廷慮恐本處官

軍不敷往往設法添撥或召集報効之人或揀選空間之士遇有緊急相兼守戰近有外敵侵逼邊務愈加畱意而宣府總兵等官未審因何却將自願報効操備官員擅自放回原衛誠恐奉有別衙門行移止知減省糧儲不顧邊務緩急因見外敵請和將謂邊方無事遂將各邊見操官軍人等一槩踈放回家倘有外敵聲息城池空虛憑何戰守又恐見操官軍人等意圖回還原衛串同該管官員不行經由本部援例徑自回還典守之

官無由得知奸詐之人得遂私計萬一外敵緝知官軍掣動乘間來攻遺患邊方決非細故兼且各邊屢稱見在官軍數少具奏要行增添豈可將見在邊操守十餘年之上官員輒便放回臣等職掌兵政若今日緘默不言則異日罪將何道况近日敵使方回中間奸詐難測防微杜漸不可不慮除千戶王信仍送該府轉發宣府總兵官處照舊操練外合無通行各邊各關總兵鎮守等項內外官員將原有見在官軍人等務要用心提督

操練非奉勅旨及本部奏奉欽依明文不許輒准別衙門行移擅便掣動踈放以致邊方缺人遇警誤事自取重罪不便仍行在京各衙門知會緣係處置邊務事理具題景泰二年三月十一日奉聖旨是欽此

兵部爲糾劾事嘗謂移孝爲忠乃人臣之當務懷奸避事在國典所不容竊照左軍都督府右都督王禎猥以庸才叨膺重寄因人成事素無汗馬之勞荷國寵榮遂極人臣之位不能盡忠圖報惟務挾詐偷安明知即目

邊務方殷正係用人之際自合捐軀以先士卒庶殫臣
子之心却乃陳言要回陝西在城省視伊母周氏緣延
綏亦係陝西地方本官既有孝親之心合般移就養今
妻妾隨住而同享天祿老母遺棄而不得霑恩處已若
斯孝心安在及見邊方多事却欲給假省親不過假此
爲名以遂懷奸之計皇上明照萬里燭見其奸聖斷昭
然不蒙准理臣等竊惟自古求忠臣者必於孝子之門
今王禎平居則棄其親而弗養遇事則假其親以欺君

不孝不忠不仁不義雖聖恩不加其誅責奈王法莫縱
於纖毫合將王禎拿送法司問罪以爲萬世臣子之戒
緣係守邊軍職具題景泰二年四月二十九日奉聖旨
罷都察院通行文書與他知道欽此

兵部爲軍務事兵科抄出提督遼東軍務左都御史王
翱題景泰二年四月日期不等節據遼東都司竝廣寧
錦州義州寧遠等處備禦都指揮劉英等呈該尖山鎮
北山荆條山寧遠河牛心山雙山寨兒山駱駝嶺白土

廠等墩空各差軍走報瞭見境外千家峪金銀廠大黑
山羊羔山筆架山刀筆山白雲山泥河兒官音山雙林
兒等處各有烟火一十六處及廣寧小黑山墩又稱瞭
見境外達勒三千一百并五百有餘人馬約離牆十里
往東南東北去訖及據廣寧前屯衛備禦都指揮鄧繹
等呈該石子河劫殺小旗高昇走報本年四月十一日
酉時瞭見達勒三十餘騎從松栢烟墩西克內跑牆入
境搶去三千營種田舍餘自己馬牛驢一十三隻官馬

三足別無搶去人口結呈到來臣等議得廣寧前屯衛
地方外敵入境松山等墩守瞭官軍人等不行隨即舉
放煙火以致種田舍餘不得知覺被外敵將官私馬牛
驢一十六隻搶去及巡視地方指揮姚鑑亦不嚴謹巡
視俱合取招量情責罰照舊巡守官馬三足著落都指
揮鄧繹何鑑同馬軍均追還官再照各該沿邊累報瞭
見沿邊人馬烟火除通行守備都督都指揮等官整搦
軍馬於緊關邊堡去處暗伏相敵衆寡行事并督守墩

官軍晝夜十分加謹用心仔細瞭望謹防隄備外具題
該本部官俱欽奉聖旨兵部知道欽此欽遵抄出到部
叅照所奏前項外敵入境搶掠頭畜王翺等既已照例
將巡視地方指揮姚鑑取招量情決罰均追官馬還官
了當別無定奪係干聲息合當隄備毋或疎虞誤事緣
奉欽依兵部知道事理未敢擅便景泰二年五月初六
日奉聖旨是欽此

兵部為軍民利便事兵科抄出兵部等衙門左侍郎等

官孫原貞等題准兵部備刑部咨該臣原貞題前事照得見獲溫處二府瑞安清田等縣首從賊寇翁朝原等并幼小男女俱各解京發落爲照賊犯家屬多未挨拏緣干人衆各處一槩挨究恐人驚懼不安乞不爲常例候賊平之日查勘隨征軍士無家小者將已獲賊屬婦女先儘有功軍人給與爲妻幼男紀錄候長定奪并幼女隨住未獲賊屬矜免抄提具題該通政使司官奏奉聖旨該衙門知道欽此欽遵抄出到部叅照先擬作耗

賊屬男子律該處斬婦女給配欽蒙朝廷寬恤男子充軍家口隨住若再矜免無以懲戒俱難准理又言要將賊徒婦女給配有功軍人一節照得賊屬內有隻身婦女無男子隨住者合無准其所言查勘原征旗軍人等曾見功勞應該賞賚見無妻室者給配爲妻兩得其便再照各處賊徒家屬候事平之日陸續挨解則事無逼迫人得安寧該刑部官具題奉聖旨是欽此欽遵轉行移咨除欽遵外臣等同欽差鎮守浙江太監李德鎮守

處州奉御阮隨議得反寇攻城掠邑拒敵官軍殺害生靈燒毀房屋搶虜婦女貲財累赦不悛原其罪惡雖赤其族猶有餘辜况溫處等府麗水清田瑞安平陽等處地方節次生擒殺死賊犯動以萬計今欲照戶抄其家口少者二三口多者十餘口或三四十口賊屬之衆不可勝數其間有父兄子姪或避難在外或報効在官一槩抄提若造惡渠魁家屬法固難宥其被脇爲從家屬情有可矜今班師振旅反側稍安其屬仍要陸續挨拏

府縣不無督責鄉里未免驚疑賊屬逃遁山林必致復聚爲非難於撫捕未便如蒙准題乞勅該部計議賊首家口照例抄提發落賊徒家口特降聖恩矜免即書所謂殲厥渠魁脇從罔治之意且以安疲困之民息逋逃之患會本具題本部官欽奉聖旨該衙門知道欽此欽遵抄出到部叅照奏稱要將前項賊徒家口特降聖恩矜免一節緣浙江地方近年以來其處州等府所屬州縣節有賊寇糾集人衆殺掠人財已該彼處鎮守等項

官員欽遵上命督領官軍宣明朝廷恩例隨宜設法撫捕賊首多已成擒地方漸就平安正當一視同仁誕布維新之化量爲矜恤以安反側之心所據前項賊徒多有賊首逼脇不得已而爲非家下人口衆多若便一槩抄提非惟牽連負累情有可矜抑恐紛擾驚疑因而激變又恐中間見在者少逃移者多爲因畏懼罪責終無復業之期倘復嘯聚山林安知不爲後患合無俯徇下情照依侍郎孫原貞等所奏除賊首家口照例抄提其

賊徒家口伏乞聖恩原宥令其安生樂業永爲良民若
再逃移生事必誅不宥仍令孫原貞等會同太監李德
并巡按御史及都布按三司查照施行務在仰體聖心
公道行事俾賊首之家不致脫免而脇從之衆咸與生
全以副皇上好生之仁以消地方意外之患緣奉欽依
該衙門知道事理具題景泰二年五月十二日奉聖旨
是欽此

兵部爲備邊禦寇事兵科抄出吏部考功清吏司郎中

陳疊題臣聞外域自古與中國通在乎有以禦之禦之有道則可以銷其驕悍之氣而朝廷無北顧之憂苟無道以禦之則憑凌桀驁其患不可勝言矣比見衛拉特初與朝廷通好歲時貢獻賞賜鉅萬豈期自啟釁端侵擾邊鄙頃歲以來縱橫尤甚近聞又分人馬一枝往遼東一枝往陝西又遣人來京進馬求要使臣臣愚竊計瓦剌人馬本自強盛今謀欲攻宣府大同以及京師故先遣人馬收掠遼東陝西邊境之人以益其衆且恐朝廷

知其勢分力寡乘其不備出師擊其各枝人馬仍復假
設遣人進馬求要使臣以緩中國用兵之意俟其遼東
陝西人馬回聚一處秋高馬肥併力內侵此其狡計也
今議者皆以兵備未脩糧草未備祇欲遣使往答其意
以圖延緩不復敢言戰者殊不知彼番求欲遣使實非
畏威懷德而來蓋將東征西討而以此延緩我師矧縱
遣使臣量亦不能釋其素負驕悍之氣不此之察是自
失機會而墮其計中矣如蒙准言乞勅總督軍務總兵

官量率精銳官軍數萬倍道趨遼東或陝西邊境仍勅遼東或陝西主將分兵刻期會於近邊去處物色外敵所在上賴祖宗之靈合兵出奇擊其一枝人馬彼進不敢敵退無所援強盛之衆將自窮感戰勝可待也計不出此徒因議者之言逡巡畏縮日復一日使其收掠遼東陝西二邊之人大衆復合併力內侵宣府大同一或失守京師之患又孰甚焉夫用兵雖貴持重然堂堂天朝文武大臣效用之日久矣當國家多難之際必有效忠奮勇之士乘時而出兵部掌

軍馬戶部掌糧草職專任重亦必預為之計動以其時宜無不可若敵臨境諉以未備則豈持重備禦之策哉昔唐憲宗欲伐吳元濟羣臣以其兵利卒頑皆謂不可憲宗明斷不疑命將出師迄成平蔡之功竊觀今日之事亦頗類此伏望皇上斷而行之天下幸甚愚叨祿無補偶有所見不敢不言具題本官欽奉聖旨兵部看欽此欽遵抄出到部看得郎中陳疊奏稱要總督總兵官量率精銳官軍數萬倍道趨遼東或陝西邊境及令遼東陝西主將分兵剋期

會於近邊去處攻伐外敵一節臣等竊詳番酋額森等自正統十四年肆爲陰謀鳩集彼衆侵逼邊境殺掠人畜其罪惡稔盈人所共憤實宜統率大軍聲罪致討但自去年以來節次遣使朝貢欽命武清侯石亨克總兵官都督孫鏜范廣過興張義克左右副總兵叅將於五軍三千神機等營挑選精銳官軍三千聽候策應遼東等處都督劉深另操官軍三千聽候策應遼東等處都督石彪雷通另操官軍六千聽候策應宣府等處并令

工部尚書石璞總督宣府等處軍務遇有緊急軍情各
城軍馬竝聽節制相機勦殺近該石璞具奏彼處烽火
不見邊事頗寧又况兵家之事以直爲壯以曲爲負而
制勝之策以主爲逸以客爲勞必使計慮出於萬全然
後戰守可無踈失今額森寺雖陰懷邪謀而尊事朝廷
之禮不廢雖聞聲息而侵擾邊境之事未舉在我當爲
預備難以自開釁端又况關陝遼海相去京師寫遠即
目天氣炎熱大雨時行若使統領大軍出境未審敵營

果在何處駐劄待我兵至非惟輕易舉事而弗中機會
抑恐虛勞士馬而迄無成效況各邊所積糧草有限軍
馬用度無窮揆之事勢未見其可合令在京總兵等官
武清侯石亨并都督劉深石彪等將選到團操官軍務
要申嚴號令齊備器械俾軍威壯固士馬精強不時點
間教演以備警急調用既不許怠惰偷安以廢紀律亦
不許先爲畏縮以損軍威仍令石璞等將宣府等處軍
馬用心整搦差人嚴密哨探若有外敵侵邊必須相機

行事若果敵勢衆大星馳差人奏報京師發兵前去應援勦殺并行遼東陝西大同總兵鎮守等官左都督曹義定襄伯郭登興安侯徐亨都督王禎張泰王敬都御史王翱年富陳鑑馬恭韓福宋傑等各照地方將應有軍馬務在躬親逐一挑選精壯之士畱意訓練諭以大義嚴其紀律使將士相知上下同心候有外敵來侵就便隨宜戰守或堅壁清野以待其敝或乘虛掩襲以挫其鋒既不許畏縮無謀縱敵搶掠亦不許輕易窮追墮

彼奸計此乃保邦禦敵長策緣奉欽依兵部看事理具
題景泰二年五月十六日奉聖旨是欽此

兵部爲糾劾事該錦衣衛指揮使劉源等題該廣西道
監察御史陳叔紹等奏稱守備倒馬關署都督僉事劉
聚於奉天門復命照得劉聚先因賣放守關軍人及私
役軍人創立寺院等情該兵部奏准行移巡按直隸監
察御史全智將這廝提問未見發落今這廝擅自來京
合當拏問奉聖旨拏了欽此欽遵見今收在直房具題

奉聖旨著兵部查他原發來看欽此欽遵抄出到部查得先該協同守備倒馬關都指揮陳友題稱臣到於倒馬關點視得原撥守關軍人王成劉智張廣兒三名不到審據管隊指揮何清等說稱鎮守都督劉聚放回在京一向不曾到關守備顯是受財賣放臣看得各關隘口多有未曾脩理却有劉聚擅撥官軍千戶郭仁等五百餘人在於倒馬關西門外新初寺院一所有此不行奉公專一營私利己等因具題抄出本部爲照劉聚不

以邊務爲重將原撥守關軍人王成等賣放回京以致各關隘口多未脩理又行擅撥官軍私自蓋立寺院於法難容合行巡按直隸監察御史將本官提問明白具本解京奏請發落若是有礙職事另行定奪如是無礙原職令嫡親兒男替職仍先請勅陳友代替劉聚守關等因具題本部官奉聖旨是欽此除欽遵通行外今抄前因叅照劉聚本以庸材叨居重任先在浙江等處殺敵無勇無謀失機誤事已該本部等衙門節該劾奏欽

蒙恩宥降做爲事官續蒙上恩令署都督僉事守備倒馬關本官自合洗心改過加意脩守以贖前罪以答皇上之恩却乃怠廢邊務肆無忌憚既將守關官軍賣放回京又行擅撥官軍私造寺院以致下人失所邊務廢弛致被陳友奏發本部又經奏奉欽依令巡按御史提問豈期本官益肆桀驁蔑視國法公然不服行提却乃赴京復命似此冥頑無狀方命辜恩若不嚴加懲治無以警戒衆人合將本官令法司照依本部原先叅奏并

今次不服提解緣由問擬明白奏請發落庶使法令昭明奸頑知懼緣奉欽依著兵部查他原發來看事理具題景泰二年五月二十七日奉聖旨這廝奸頑著三法司門前問欽此

兵部爲乞恩憐憫事兵科抄出山東都司濟南等衛所指揮僉事王震等奏臣等俱在五軍右哨操備景泰元年月日不等有萊州等衛馬步軍人王受兒等私自逃回原籍取討衣鞋已經具數造冊轉送挨拏去訖後於

景泰二年二月內遇蒙恩宥其王受兒等照例具狀首
出收操轉達住提致蒙兵部叅照違例擅收在逃軍人
王受兒等把總管隊官員提送本部轉送法司問罪兵
部奏奉欽依是欽此欽遵備由劄付到哨將臣等查提
送問臣等俱係軍職愚昧多不識字比因操事繁冗失
於仔細查理自合省令各軍赴通政使司首告轉達送
發不合擅自收操合當有罪况臣等八十二員本哨見
選管領頭撥官軍六千員名在團營六萬數內操練聽

調人員及青州左等衛指揮僉事劉安等三十員名該班領軍回衛取討衣鞋人數今將臣等送問不無遺下隊伍旗軍無人鈐束又慮團操旗軍因見放班中間恐有不知利害之人一槩逃竄倘遇調用有誤事機未便臣等在京操備二年之上衣鞋破碎實爲困苦艱難如蒙伏望聖恩憐憫乞將臣等并坐營把總等官都指揮同知毋瑛等暫且團營管操聽用候取討衣鞋官員赴操之日仍前受罪便益臣等干冒天顏不勝感戴之至

具本該通政使司官奏奉聖旨罷兵部知道欽此欽遵抄出到部查得先該後軍都督府經歷司手本該准都督同知衛潁備署都督僉事劉鑑咨據五軍右哨都指揮趙輔等呈據萊州等衛軍人王受兒等狀首景泰元年月日不等私自逃回原衛首乞收操等因到哨呈乞住提等因到部爲照王受兒等俱係赴京操練之數不思補報公然在逃該營已經具數行移本部通題去後未審各軍因何不經通政使司照例具告送部轉發却

乃徑自赴京亦未知即今有無見在顯是把總管隊官
員互相欺蔽朦朧擅專恐有買囑情弊合將各官并在
逃軍人王受兒等通行提送法司問罪不許總兵把總
等官徇情作弊等因具題奉聖旨是欽此除欽遵外續
該都指揮趙輔等奏稱要暫候輪班回還取討衣鞋來
京問罪等因本部又照各官奏准提問人犯難准推奸
又經駁仰提解去後今抄前因除指揮等官王震等已
蒙恩宥別無定奪外叅照都指揮等官趙輔等俱係坐

營官員一應事務俱係各官主張比先徇情作弊欺公
玩法將在逃軍人王受兒等聽囑違例擅收在營不曾
問罪即今各軍亦未審有無因被本部奏發提問懼怕
法司問出真情一向不服提解今又自不出名指使指
揮王震等連名陳奏意在乘機脫免以遂奸計似此舞
文欺罔阻壞軍法難以容恕及照先次放班回還官員
指揮夏正先因帶領軍士不到挨解軍數不完本部奏
奉聖旨提問延今日久其坐營都督衛顥等公然不行

提解亦欲倣倣趙輔等指使下人捏詞妄奏脫免况國家重務莫先於兵人之生死實繫乎將必使將帥竭忠盡誠然後軍士輸心効力先前土木之敗皆因平昔將帥之奸欺威令之不立賣放軍人者以爲尋常隳廢軍政者恬不加意以致外敵得計我師挫衄今放班回還將帶去官軍不肯回京該補官軍又不足數及致叅奏拏問又復方命故違萬一倣倣成風則一次放班一次軍少積弊既久又復如前非惟緩急之際有誤調用抑

且軍政不立壞事非輕及二次放班回還官員亦有欠少軍數多者因見前班誤事官員不服提問亦皆互相效尤全不整理其帶去并該補軍士爲見團營操練以備出哨俱各畏懼征操通同回班官員躲避不出其把總都督等官竝不比併追究亦不叅奏查明止是調弄虛文苟延度日平居如此遇警可知臣等猥以菲才叨典兵政竊惟今日之事正當申明軍令期收方來之效豈可因循苟且仍蹈前日之轍今趙輔等不改前非仍

復作弊若不提問懲治無以警戒衆人除指揮等官王震等若干員照依欽依事理住提外其坐營官不過三四員必須通提問罪以懲一戒百合將坐營都指揮趙輔等并各都司衛所放班赴京違限及挨究官軍不完官員行移該府轉行該營令總兵把總等官逐一查究送部轉送法司問罪及將第二次放班各軍官員一體叅奏拏問如不欠軍者不許一槩朦朧奏提如若仍前懷奸展轉日久不即提解通同捏詞妄奏將該管總兵

等官一體叅奏拏問不許奸詐小人市恩一已歸怨他人以誤大計庶使奸頑知懼法令昭明兵備不致廢弛緩急不致誤事便益緣節該奉欽依兵部知道事理具題景泰二年五月二十八日奉聖旨是趙輔送刑部問欽此

兵部爲防患事竊照福建浙江湖廣貴州廣東等處地方近年以來爲因旱澇相仍民多艱窘有司不才官吏不能盡心撫綏却乃生事逼迫以致盜賊竊發善良被

害上千宸慮勞師遠征天心助順將士効力所在寇盜
以次削平各處地方漸就寧謐此誠國家萬萬年太平
之慶臣等竊惟大易有思患預防之言虞書著儆戒無
虞之訓是以古之聖帝明王制治保邦之心未必不先
事而慮今朝廷凡一應軍需財用糧餉物料大率取辦
江南軍民僭運供給當此賊寇頗寧人心甫定之際所
宜維新命令以防患於未萌看得湖廣貴州苗蠻多係
巢居穴處其性頑獷易動難安其靖州曾定等處餘寇

未盡翦除福建浙江多係山深林密去處爲因產有銀
礦頑民往往尋跡竊取稍失防閑輒便仇殺近雖温州
等處地方各起盜賊已曾擒獲千連抄提人口該鎮守
官侍郎孫原貞具奏要行寬宥本部依擬覆奏欽准免
其抄提令其復業誠恐舊染未除驚疑未定因爭小利
復起釁端又兼原調殺賊軍屬多已散回各衛各班捕
盜領軍官員亦有取回原任者萬一不逞之徒踵爲嘯
聚重複議說方略征討轉餉撫捕不免事出倉卒人愈

勞困雖皇上聖德遠被萬方決無此虞然防微杜漸不可不慮近雖節有欽奉詔書事例并本部行移各處鎮守等官令其隨宜招撫叛寇慰安軍民未免循常不能聳衆合無請給聖旨榜文本部差官舍人等分投馳驛齎與湖廣貴州廣東廣西福建浙江等處總督提督軍務及鎮守等項尚書都御史侍郎等官薛希璉王來孫原貞李棠孟鑑寇深李匡等令其各爲謄寫有總兵官去處用總兵官印無總兵官處用所在本布政司印於

各府州縣土官衙門去處張掛曉諭軍民番夷頭目人等爾等先前或爲不才有司激變或爲豪右大富凌逼或土官倚恃暴橫不能撫恤或守臣不得其人騷擾或爲賊黨哄誘或爲賊人虜掠不得已從賊爲非今賊首多被官軍擒獲爾等有草心改過復還鄉里者亦有陽爲順附陰持譎計者且爾等自從祖父以來受國家恩養將及百年祖宗墳塋父母妻子完娶保守足以衣食爲良民久矣今一旦舍順從逆去安就危其所以至爲

官軍殺獲宜矣自今益思保全之計輸誠順附各安其
業朝廷體天地好生之心廣一視同仁之量前罪俱置
不問共享太平之福永永無害若或陰恃譎計竄遁山
林圖爲日前之謀不顧後日之禍則命將出師設法擒
獲首從必殺無赦悔將何及爾等雖一介編氓或生蠻
種然好生惡死人之常情趨吉避凶世之通論爾等不
可不審死生吉凶之理其各司府州縣宣慰宣撫長官
司等衙門官員自茲以往亦宜洗心滌慮奉公守法撫

愛下人不許貪婪酷暴肆爲凌虐以致激變小民重貽
後患如若仍前有違一體處以重罪如此庶可以安反
側之心而消意外之患本部仍通行薛希璉王來孫原
貞孟鑑李棠寇深李匡等令其公同彼處鎮守總兵等
項內外官員及巡按御史都布按三司堂上官員從長
計議陳設方略何處殺賊十分盡絕何處賊寇尚未平
妥何處軍馬可以散回何處官軍宜暫守備何方可以
絕後日之患何策可以爲經久之計備將議過防患方

略逐一具由差人馳奏以憑定奪不許因循苟且虛飾
繁文自貽方來之患緣係邊患事理具題景泰二年五
月三十日奉聖旨是欽此

兵部爲安邊固國強兵禦敵事兵科抄出山西太原府
代州緣事爲民前布政使戈謙題臣聞兵者國之大事
社稷安危民命死生之所繫故自古興師動衆必審擇
將焉夫將有名有實所謂有名如李廣李陵輩卒無成
功是也所謂有實如李牧趙充國輩卒建偉勲是也故

任將之道貴用其實不貴用其名耳曩者北兵入侵王
師應之始則失律喪衆以致辱及萬乘之尊終則聽敵
按轡長驅直逼都邑喋血神京震驚寢廟繼而縱敵肆
行剽掠殘害生靈欲東即東欲西即西窮兇極暴如蹈
無人之境我師竟無一捷少挫其鋒以報君讎以雪國
恥者正由擇而不審用之不以其實故也況彼酋額森
乃實大姦向既大得志而歸勢必復來欺侮此來人馬
必衆必有覬覦中原之心亦非前日之比而我當國謀

臣至今將帥不聞有智愚之別兵馬不知有簡募之方
觀其塹山寨谷等項設法乃皆兵中之末務殆非所以
安邊固國強兵禦敵之要策也朝廷若不早爲令圖一
新威武止靠舊日虛名文字虛名武備玩愒日月誠恐
一旦禍臨卒難收救致誤祖宗天下蒼生性命其事非
小今若得安邊固國強兵禦敵必先推選良將將得其
人以守則固以攻則取以戰則克又何患外侮之憑陵
我績之弗集耶聖朝堂堂天下智謀良將應多但臣居

田里莫能周知其所知者獨前成山侯王通龍門衛致仕指揮甯懋真定府同知阮遷干此三人者籌策宏博慣經大戰臣今指其實略陳之昔交趾黎賊有二大將名黎多黎善其冥頑克狠無異額森作耗年久前後所陷官軍不可勝數宣德元年推王通總兵征討初值地利不便亦大敗衄王通身中重鎗獨以一騎僅免到城并陷叅贊尚書陳洽於陣前次日賊衆圍城城中人期一死無復生望此時出榜招募一應軍士迄得數千之

衆分爲三軍內選精銳三千王通統率教演既熟遂出
師擊賊一戰斬黎豸再戰生擒黎善自是大戰大勝小
戰小勝賊衆殺死垂盡賊徒死者僵屍蔽野生者悉推
落江江水爲之不流兵法曰有制之兵一能當百於斯
信矣厥後賊人過江出戰止在江岸堅壁拒守遣大頭
目告云願照洪武舊制年年進貢歲歲稱臣乞總兵官
照依初克交趾舊制班師比先又見安遠侯柳升所統
援兵全軍覆沒王通遂會官議曰交蠻負固恃險叛服

不常每遇調兵動輒數萬不應以此稍末無益之地致令根本空虛倘值中原四方有事將何應用此地決可棄不可守各官依允班師退出此王通所以棄地之心耳王通誠當今忠良儒將每遇敵臨陣輒忘身家有進死之榮無退生之辱矧累隨太宗皇帝征進迤北蒙太宗丁寧教誨破敵秘計使之熟記在心以爲中國制禦之長策前歲因臣到京建言舉保王通爲將本官亦將所得秘計畫成圖本奏乞朝廷納用欲就與臣等共計

破敵時臣獲見圖本其妙盡藏于陣勢於我兵勇者不能獨進怯者不能獨退於彼敵無鋒不摧無堅不破真秘計也不期秉政重臣不悅王通并臣所奏兼惡王通爲人高傲又見議論立異不合已意遂睽乖舐齟有同矛盾不惟不肯奏保王通且反陽薦陰擠著令王通修守山陵而已使聖上徒有求言之名而無納言之實病國病民莫此爲甚臣嘗怪戰國文武羣臣不相協和不能遜賢讓能妄以智詐相稱往往而致禍敗者夥矣不

料昭代臣僚亦有此弊良可悲嘆近聞朝廷下求禦敵
安邊的確謀計誠當時之急務也如蒙聽臣猥見選調
在京精銳馬步官軍八萬命王通甯懋阮遷干及其他
所舉將帥公同統率前去宣府大同會同總兵官郭登
等各城并操備官軍數內再選精銳馬步四萬共轄一
十二萬俱作戰陣郭登等提督其餘官軍專一守城若
遇機會亦聽出城破敵王通提督戰隊專一戰伐臣知
王通甯懋等於軍旅有簡閱之方有訓練之法有獎勵

之術行之有紀律出之有正奇號令必嚴賞罰必信緩則五月急則三月應見武備大飭軍威大振於是國家可得倚仗農業可得耕獲糧餉可得轉輸遐邇人情亦得賴之寧帖而不搖矣一朝有警即於近城水草便利地方緊要去處安下野營兼有太宗皇帝破敵陣法遏止外敵人馬當戰則戰當持則持使不得深入腹裏因糧藉食彼孤軍懸入食必不繼久必饑疲我乘其敝則殲殄其類而收萬全之功必矣我算既定我武既備彼

若仍挾勢驕恣詭以進貢要我貨財初至姑可待之以
禮撫之以恩曉之以尊卑示之以禍福如至再三再四
要求無饜當止其進貢絕其和好或猶不聽恃強愚弄
宜將差來徒黨不問衆寡盡數斷其右臂割其耳鼻放
回明報也先速來交戰使敵一戰之頃嘗其陣味知其
兵力則必震懾遁去苟北敵一破摧挫遁去而南方一
切草寇聞知朝廷兵威之重亦從此而自消釋不敢作
亂必矣若王通甯懋阮遷干蒙命受任之後不能耀武

揚威建立控制戡定之功臣願當萬死之刑仰謝誑君之罪或曰王通領軍三千月久無功其能安在夫善爲將者不貪小利不邀近功況大將當大受不可小知又恐敝卒殘兵不堪調用豈可遽以此而疵之也臣於此一事其言屢獻而不止者絕無希求進用之心特竊念今日朝野臣子有如同舟共濟中遭大風巨浪必合盡其心竭其力庶幾渡此危險否則一至舟沒俱爲水中之鬼此臣所以爲國之誠耳至於邊儲充足之事除常

賦稅外宜倣漢文拜官入粟塞下故事臣於前歲題本
內已詳言之矣伏願皇上御覽之下勅五府六部都察院
大理寺翰林院六科給事中共議倘將臣言不致似前
棄寢採納施行則宗社幸甚億兆幸甚具題該通政使
司官奏奉聖旨外敵犯京師比時也任用王通不見他
有謀勇者後多官議山陵緊要去處著他鎮守任使非
輕今這廝說擠著去脩守又他所舉的人爲智朝廷所
用的人爲愚若要十二萬人守大同其餘邊陲得幾萬

人馬備禦兵部通看了來說欽此抄出到部除奏要拜
官入粟行移戶部另行外查得先該戈謙奏稱要起調
官軍六萬員各令都督王通等統領令伊白身叅贊分
爲三路約期會合撲擣敵營等因該本部會官議得外
敵額森侵犯邊境逼擾京畿上貽九重之憂下爲萬姓
之害所宜發兵勦滅以復不共戴天之仇但以兵家之
事必多算而後勝爲國之道先治內而攘外今畿甸及
中原地方自擾攘以後民失農業公私匱乏京師帑藏

之儲積有限官軍之費用無窮而各處邊境地方糧草俱無蓄積萬一調發人馬供餉從何而來非徒誕謾無實而難行抑恐輕易舉動而壞事及照王通先在交趾鎮守失機誤事捐棄地方都該死罪欽蒙宥死黜罷爲民近蒙聖恩陞授都督同知率領官軍在於天壽山鎮守脩理關隘達靶在驢鞍嶺地方剽掠正係本官提督去處却乃全無謀勇致敵殺官軍并戈謙先任交趾布政使與王通共守一城不能運謀設策棄城捐地辱國

喪師亦係宥死罷歸爲民人數既往之事如此方來之事可知古人所謂敗軍之將不可以言勇者其王通戈謙之謂也比因言者屢薦戈謙可用皇上聖明真知灼見先奉令旨不准又奉聖旨戈謙既爲民了罷欽此除欽遵外今又自薦以白身叅贊王通軍務中間顯有徇情妄舉情由難以准理等因具題各官奉聖旨是欽此除欽遵外今戈謙又奏稱王通先在交趾議以爲交蠻負固恃險叛服不常不應以此稍末無益之地致累根

本空虛此地決可棄不可守各官依允班師退出王通誠當今忠良儒將熟記破敵秘計却陰擠著令脩守山陵一節臣等竊照交趾地方永樂初年太宗文皇帝命將討平置立郡縣彼因黎賊叛逆王通掌握重兵圖復故地既有戈謙等在於軍門計議軍務所宜竭忠盡誠効力死守雖或城陷身斃猶全忠義之節各官計不出此顧乃不由君命擅棄城池挫朝廷之威遺蠻貊之笑而戈謙正主謀同惡之人顧謂此地決可棄而不可守

因而班師退出使王通戈謙爲將而守近畿萬一遇敵
窘迫亦謂不可守而棄之乎人臣之義抑又何在苟如
所言則張巡許遠之死節睢陽蓋有不足取者強辯不
忠莫此爲甚彼時各人雖置極刑猶有餘罪朝廷特降
恩典宥死爲民爾因外敵之縱橫正當用人而匡濟欽
命王通陞都督同知令其守城禦寇既無驍勇又無智
謀及在西直門外因是軍情緊急遂往寺中窩宿不敢
一出京城此時有目者所共見以後事定令去天壽山

鎮守夫以宥死之編氓驟進都督之顯官復命統領官
軍守備山陵重地禮遇渥厚任用非輕今戈謙所言如
此緣鎮守天壽山之命由於內官武良之舉未審何人
陰擠臣等不曉其由其稱要選調官軍八萬令王通甯
懋阮遷干統領并宣府大同總兵官處官軍再選四萬
共一十二萬專在大同破敵一節查得近該宣府等處
總兵等官節次奏報外敵聲息本部已經議奏欽命武
清侯石亨充總兵官都督孫鏜范廣過興張義充右副


總兵叅將各營揀選官軍六萬員名團營操練及令都督石彪雷通克遊擊將軍另操精銳馬隊官軍六千聽候策應宣府都督劉深另揀三千策應遼東并宣府大同等處邊方城池所有軍馬俱係原先派定各守本城遇警聽總兵官調度已定况托克托布哈額森節次遣人赴京朝貢請和不曾糾衆侵逼邊境即目又係炎熱時月邊儲備運不敷若便命將出師征討非惟士衆困倦難於成功抑且京師重地缺人防護合無候彼境界有

釁隙可乘各邊糧草足備另行計議大舉以復前日之仇其言要將來使斷臂割耳等因乃彼小丈夫之事而非爲國大體所言難准臣又看得戈謙奏內所言秉政重臣不悅王通及病國病民莫此爲甚等因雖不明言爲誰臣等實掌兵政意在指臣爲辭竊念臣本以書生叨膺重寄既居保傅之官又兼六卿之任加以總督軍務而才器不逾於常人聲望弗協於輿論屢嘗懇辭未賜俞允茲當多事之秋正係更賢之日苟復冒昧貪榮

不知紀極萬一有誤大計萬死莫贖戈謙所言激切反
覆不置必有所見而各營總兵等官武清侯石亨等雖
係任用既久事無過舉屢効勤勞而戈謙亦謂將無智
愚之別兵無揀練之方中含不足臣觀戈謙之意必欲
用王通及已臣等所言王通戈謙之事但因其既往而
逆其方來猶恐王通等別有奇謀異見非臣所能窺測
不可有妨賢路合無將王通甯懋阮遷干量爲陞授就
令王通石亨等官掌管前項團操軍馬及將戈謙亦量

陞職代臣總督軍務令各官務在展布平昔抱負措置
匡濟艱難不可又如臣等愚昧無知虛文應用惟望復
臣右侍郎舊職佐理部事及兼管操練遇警隨軍破敵
以圖補報庶幾合衆論之公愜天下之望臣叨受國恩
至深至重所宜盡死豈敢辭難但輿論不容兼且恐誤
軍國重計以獲罪於身家以獲罪於天下後世以獲罪
於天地鬼神以此昧死干瀆天聽緣節奉欽依兵部通
看了來說事理具題景泰二年六月初二日奉聖旨戈

謙言不顧行自己
有過却說他人既
先辱國喪師不可
復用王通仍舊鎮
守山陵甯懋阮遷
干著跟石亨團操
但有聲息調當先
破敵有功一體陞
賞其餘的事不必
論欽此



忠肅集卷八